

Tiwei Pol Kewisik Ken Timoti - 2

Menmen me tiwei ik

Pol katip Timoti gude 1:1-2

Pol kewepyapir menmen mau mekre ehan kirak katip Timoti em 1:3–2:13

Pol katip Timoti menmen me ewok hirak kakisesim 2:14–4:5

Pol katip Timoti menmen mau emarkeik me hirkes 4:6-18

Pol katip Timoti him mikaru 4:19-22

1 ¹Hi Pol hi aposel ke Krai Jisas. God kehimitena hi hatip mit miyapir him mirak hentar nipaa hirak katip mit kerek nises him me Krai Jisas, hir nanit himin yaaik nanu werek werek.

²Timoti, ti nikan kai yaaik ke menmen me God, hi heswut tiwei ik e. Hi hanhan God Haai ketike Krai Jisas Mitik Iuwe kiau hirakit han tewenininit tatrekyut yaaim, te ti ehu werek werek.

Haiu ap yink enuk mentar him yaaim me God au emit

³Maamrer nai hir epei nises him me God, hir nekepa te hi hises him mirak har ke hir nisesim. Hi hertei hekre han kai hi hisesim werek werek. Witaan wanewik hi hitehi God menmen, hi han kitetit te hi hatip God hirak yaaik kenterit. ⁴Hi han kitet nipaa hawir winaipisakit, ti hikita. Hekrit hekrit hi hanhan arit te hi han yaaik ehu. ⁵Hi han kitet menmen me God ti hisesim, ti ap hemipin au. Ti hisesim werek werek. Nipaa maam pit niuk mire Lois wetike miye pit Yunis hir ninin nises God werek werek, te in ek hi hertei werek ti hisesik har ke nipaa hir nisesik. ⁶Te in ek hi eketut han em te ti naanmipre menmen yaaim nipaa God kewetutem wi kerek hi hewis his mentar paan kit hitehi God me ti. Ti eriakem iuwe ehir ke mitik ketenwo si yeunek merhihe, ti ekaap mit eriuwerem ⁷hentar ti hertei God ap kewetai Himin kirak Yaaik hirak

^a 1:1 Ef 1:1 ^b 1:2 1Ti 1:2 ^c 1:3 Fl 3:5; Ap 23:1, 24:16 ^d 1:5 Ap 16:1 ^e 1:6 1Ti 4:14
^f 1:7 Ro 8:15

kenipai haiu mīnaain au. God Himin Yaaik kenipai haiu mamu han tokik, haiu hanhan mit, hirak kekepai haiu mamwen han kai me menmen haiu mamisesim.

⁸Te ti ap yink enuk hatip mit miyapir him me Mitik kiau Iuwe au emit! Ti yink enuk heriuwa hi hekre winak enuk ke gavman hentar hi hatip mit miyapir him mirak au emit! Mit nanrekyut enum hentar ti hatip mit miyapir him me God, hirak kakikepit te ti han tokik ehu etikewa me menmen im. ⁹God kekepai ketaihis keninai haiu mamre nikerek nirak. Hirak kehimitenai kentar haiu yaain au. Haiu enun. Hirak kehimitenai kentar han kirak kerekek hirak han teweninai. Nipaa God kewis ti wen au, hirak han teweninai katip maain hirak kaksuwe Krai Jisas kaknen kakikepai. ¹⁰Te in ek, hirak epei keteiknai hirak han teweninai. Hirak keruwet Jisas Krai hirak epei kan kaktaihis naanmamrai. Hirak keremir menmen menip haiu mit haiu mami, hirak keteiknai keriuwe him mirak yaaim mar kerekek haiu mamit himin yaaik haiu mamu werek werek tipmain tipmain enum eik. ¹¹Me him mirak yaaim keremem, hirak kehimitena hi aposel kirak, hi hewep him mit miyapir hetpor him mirak. ¹²Mit nerewaank nenterim, te hi yink enuk au. Hi hertei keimin hi eisesik, hi hertei hirak naanmipre menmen hirak kehimitenewem hi hiriakem ere wi maain hirak kaknen skelim mit han kitet menmen hir niriakem.

¹³Te ti ehises him yaaim ti hemtewem hi nipaa hetputem. Him im hiram mire piksa meteiknut menmen yaaim. Ti wen eises Krai Jisas ti hanhanek ketike mit har ke haiu mit yapirwe ne Krai Jisas miriakem. ¹⁴Ti naanempre werek werek him yaaim me Krai God Himin Yaaik kerek kau kekere han kiau hirak epei kewetutem.

¹⁵Ti hertei werek werek hirak Fiselas, Hemosenis tetike mit han yapirwe ne provins Esia hir yink enuk neriuwa nineina ninaipisa me wi mit newisa hi hen hekre winak enuk ke gavman. ¹⁶Hi hanhan God kakriak mitik Onesiforas ketike mit nirak menmen yaaim. Me wi yapirwe hirak kekepa kenipa han yaaik. Hirak yink enuk kentar hi ekre winak enuk au. ¹⁷Hirak kipiun wit iuwe Rom, hirak kinketnau kinketnau ere hirak kenepya. ¹⁸Ti hertei werek menmen yapirwe Onesiforas kerekewem kekepa keriuwerem keit wit Efesas. Hi hanhan Mitik Iuwe hanhanek kakrekiwek yaaim me wi maain hirak skelim haiu mit han kakitet menmen haiu miriakem.

Ti hiriak menmen me Krai har ke mitik ke ami yaaik

2 ¹Te ti nikan kai ke menmen me God, ti hepu han tokik heriuwe menmen mamkepai kerek God keweteyem kentar haiu ne Krai

⁸ 1:8 Ro 1:16 ^h 1:9 Ef 1:8-9; Ta 3:5 ⁱ 1:10 1Ko 15:55-57; Hi 2:14 ^j 1:11 1Ti 2:7

^k 1:13 1Ti 4:6, 6:3; Ta 1:9, 2:1 ^l 1:14 1Ti 6:20 ^m 1:15 2Ti 4:16 ⁿ 1:18 Ju 21

Jisas. ²Him mei yapirwe ti epei hemtau hi hetpim mit yapirwe nemtewem, ti atip mit han yaain em, te maain hir nantip mit miyapir han em.

³Mit hir neriwaank me menmen, ti wen han yaaik ehu ehises him me Jisas Krais werek werek ehir ke mitik ke ami kises him me mitik iuwe kirak. ⁴Mitik ke ami ap kiriak menmen me mit han au. Mitik kirak iuwe kerekek. Hirak hanhan kaknip mitik iuwe kirak han yaaik kakriuwerek kerekek. ⁵Mitik kesiuknen ketike mit han, te hirak ekises him werek werek au, hirak kakinin mit, hirak ap kakit menmen au. Hirak kakimtau him kakisesim, te hirak kakit menmen. ⁶Mitik kaan ni mirak kamir menmen iuwe, maain hirak kakinin kakit menmen epei me yaaim, mit han nanisesik. ⁷Ti han kitet menmen wikak im hi hetputem. Hiram mire piksa meteiknut menmen. Mitik luwe kakikepit te ti hertei menmen im werek werek.

⁸Hekrit hekrit ti han ekitet Jisas Krais. Hirak kire mitik, hirak nepenyek ke mitik iuwe Devit ke Juda. Hirak Jisas hirak kire God, hirak kaa pike kekrit kepu kepeit kar ke hi hatip mit em meriuwe him mai yaaim. ⁹Mit nerewaank hi hepu hekre winak enuk har ke mitik kiriak enum hentar hi hewepyapir him yaaim me Krais. Te mit ap newenin him me God au. Hiram mepno ein ein. ¹⁰Hiram mepno ein ein te hi han yaaik hepu hetike menmen im enum hentar hi hertei menmen hi hiriakem hiram mamkaap mit kerek God kehimitenor hir mit ne Krais Jisas, hirak kakikepi kaktorhis hir nantikerek nanu werek werek tipmain tipmain enum eik. ¹¹Haiu mertei him im hiram matip werek. Hiram matip mar im:

“Haiu mami mamtike Krais Jisas, te haiu mamtikerek mamu.

¹²Haiu mamu han tokik me menmen enum mit nerekyeyem, te maain haiu mamu mamtikerek naanmamre mit.

Haiu mepakinek te hirak kakrapakin.

¹³Haiu mare mamisesik, te maain au haiu minapen, hirak wen kakises him mirak. Hirak kakweikin his taau.”

Mitik kime menmen werek werek kar ik, God kaktip hirak yaaik

¹⁴Hekrit hekrit ti ekiak han ke mit miyapir nit en me him hi hetputem. Ti etporem him manp God kakirem, ti etpor hir ap eninehan me him ham him ham au emit! Menmen im mamkaap mit kerek nemtewem au. Hiram mamriwaank.

° 2:3 2Ti 1:8; 4:5 P 2:5 2Ti 4:8 ° 2:6 1Ko 9:7, 10 ° 2:8 1Ko 15:4, 20; Ro 1:3 ° 2:9 Ef 3:1; Fl 1:12-14 ° 2:10 Ef 3:13; Kl 1:24 ° 2:11 2Ko 4:11 ° 2:12 Mt 10:33 ° 2:13 Ro 3:3-4; Nam 23:19; Ta 1:2 ° 2:14 1Ti 6:4; Ta 3:9

¹⁵⁠Ti hirekes eriak menmen yaaim enip God han yaaik ehir ke mitik kiriak menmen yaaim, hirak yink enuk au. Ti hewepyapir him me God eteikin mit em werek werek. ¹⁶⁠Ti enapen him enum weinim hentar him mar im mamri mit han kir te hir nanises menmen enum yapirwe. ¹⁷⁠Him im enum mar wikes teknei miwapi yink ke mit. Him me mitikit wik it Haimenias ketike Failitas hiram enum mar ke wikes teknei. ¹⁸⁠Hirakit tinaipis him yaaim me God, hirakit tatip God epei keithis mit kikian. Te hirakit teweikin han ke mit han te hir ap nises him yaaim au. Hir nises him enum mar hi epei hetpim.

¹⁹⁠^b⁠Mit nises him me God, hir nire teinik God kamir mau winak, hir ap te nanises him enum naniwaaank hiras au. Me mit in God katip him im: “Mitik Iuwe kertei neimin hir nikerek nirak, neimin au. Neimin natip Mitik Iuwe naanmipror, hir eninepin enkeipin menmen enum.”

²⁰⁠^c⁠Mekre winak iuwe yaaik sar metike min yapirwe mepeit. Min ham mire gol, min ham mire silva, min ham mire toni weinim. Min yaaim mit newis menmen mekrerem newet mit em hir nanim. Min enum me toni weinim o sar, hir newis menmen enum me teipe wenut mekrerem. ²¹⁠^d⁠Keimin kenpin kekeipin him enum hirak kakir ke min yaaik kerp kemerir Mitik Iuwe kakriak menmen yaaim ekriuwerek.

²²⁠^e⁠Ti erir enepin ekeipin menmen mit pipep hanhanem. Menmen im au emit! Ti etike mit yaain han kir yaaik prar prar, hir nitehi God menmen, yi eiyises menmen yaaim me God, yi eiyises him mirak, hanhan mit, yi han yaaik eiriuwe mit yi eikiyan eiyu eiyit. ²³⁠^f⁠Ti enaaiwir him enum kerek mit netari menmen me God hir nituthiyem au emit! Ti hertei yi yatipan me him mar im enum yi einehan me menmen im. ²⁴⁠^g⁠Mitik kerek kime menmen me Mitik Iuwe, hirak ketike mit han naninehan au emit! Hirak eku han yaaik ekriuwe mit yapirwe kakteiknor menmen me God hirak han ekiwei ekwaai, ²⁵⁠^h⁠kerek keteikin mit enun menmen mir enum hir nisesim. Ti ariakem haiu mepitari God kakikepi te hir nanweikin sip me menmen enum nanirtei him yaaim nanisesim o au. ²⁶⁠ⁱ⁠Nipaa Seten keweikin han ke mit kar ke hirak ketorhis nekre hepin mirak, hirak kenipi nises han kirak. Te hir nanirtei him yaaim hir nanrir naninepin nankeipin hepin me Seten nanir ke saauk mirir mekeipin hepin me mit.

Wi menep Krajs Jisas pike kaknen, mit nanriak menmen enum yapirwe

3 ¹⁠^t⁠Ti han ekitet menmen im. Maain wi menep Krajs Jisas pike kaknen, menmen enum iuwe mamikrit mamnen. ²⁠^j⁠Mit hanhan hiras keriyen, hir paan tokik, hir han kitet hir hiras iuwe, hir nantip mit enum,

^y 2:15 1Ti 4:6; Ta 2:7-8 ^z 2:16 1Ti 4:7 ^a 2:17 1Ti 1:20 ^b 2:19 Nam 16:5, 26; Jo 10:14; 1Ko 8:3; Ais 52:11 ^c 2:20 1Ko 3:12 ^d 2:21 2Ti 3:17 ^e 2:22 1Ti 6:11 ^f 2:23 1Ti 4:7
^g 2:24 1Ti 3:3; Ta 1:7 ^h 2:25 1Ti 2:4 ⁱ 3:1 1Ti 4:1 ^j 3:2 Ro 1:29-31

hir nanises him me miye haai au, hir han yaaik neriuwe menmen mit nanrekoyorem nankepi neriuwerem au, hir nantip hiram menmen weinim. Hir naninapen menmen yaaim. ³Hir hanhan mit au, hir naninapen te nanu nanit, hir nansiuwe him enum, hir nanwenin han kir me menmen enum au, hir mit enun nepan naninaain menmen yaaim. ⁴Hir nanises him mir hiras au, hir han kakitet enum enum, hir han kitet hir nertei menmen yapirwe, hir hanhan menmen me Seten mamrekoyor han kir yaaik. God au. ⁵^kHir nemipin nanises menmen me God, te mit nanirem, te menmen iuwe me God mau mekre han kir au. Ti eweikin sip ewet mit nar ik.

⁶Mit han nar ik hir nen natip him yaaim meit winak me mit hir nemipin miyapir enun netari hir yink enuk neriuwe menmen nipaa hir niriakem, hir han kir kakrit hir nanises him heriyai heriyai. ⁷^mHir nanimtau him me mit yapirwe, te hir nertei him me God werek werek au. ⁸ⁿNipaa Janis ketike Jambris hirakit teit him me maam nipu kiau Moses him tewirem. Mar im mit in hir neminpep him yaaim me God weinim. Te hir mit han kir enuk, hir netari him yaaim me God au. ⁹Hir him mir mamikrit iuwe au. Mit yapirwe nanirtei menmen mir enum memipin mar ke nipaa mit nertei me menmen enum Janis ketike Jambris hirakit triiakem.

Ti ewis him me God mekre han kit ti ehisesim

¹⁰Au, ti etikewa hawir wariyakit, te ti hertei him mai, ti hertei menmen hekrit hekrit hi hiriakem. Ti hertei han kai hi hises God werek werek, hi han kekrit han enuk heriuwe mit waswas au, hi hanhani. Hi hepu han tokik me menmen enum mit nerekyewem. ¹¹^oTi hertei mit nesiuwe him neiyep te hir nerewaank iuwe. Ti hertei menmen mit nerekyewem meit wit Antiok, Aikoniam, Listra, mit en neiyep nerewaank enum. Hi haa au, God kekepa hi wen hepu. ¹²^pMit yapirwe kerek hanhan nises Krajs Jisas werek werek, mit naninip nansiuwe him nanriwaank. ¹³Te mit enun netike mit han enun newisesik, maain hir nanriak enum iuwe, Seten hirekes kamitorpin, hir nanmitetpin mit miyapir yapirwe.

¹⁴^qTe ti wen ehises him yaaim nipaa mit netputem ti hisesim hentar ti hertei werek mit kerek hir netputem hir yaain. ¹⁵^rNipaa ti kike miye pit wetike maam pit hir netput him yaaim me God. In ek haiu mit metputem ti hisesim. Him im hiram yaaim mamteiknut menmen yaaim ti ehisesim me Krajs Jisas te maain God kakikepit kaktuthis ti nikan kirak. ¹⁶^sNipaa God Himin Yaaik kewep han ke mit, hir newis him mirak mau tiwei.

^k 3:5 Mt 7:15, 21; Ro 2:19-20; Ta 1:16 ^l 3:6 Ta 1:11 ^m 3:7 2Ti 2:25 ⁿ 3:8 Eks 7:11, 22; 1Ti 6:5 ^o 3:11 Ap 13:50, 14:5, 19; Sam 34:19 ^p 3:12 Mt 16:24; Jo 15:20; Ap 14:22
^q 3:14 2Ti 2:2 ^r 3:15 Jo 5:39 ^s 3:16 Ro 15:4; 2Pi 1:21

Him im yaaim mamteikin haiu mit menmen, mamwepyapir menmen enum haiu miriakem, mamkepai haiu mamweikin han kaiu, mamteiknai menmen yaaim haiu emisesim te han kaiu yaaik prar prar. ¹⁷Hiram mamkepai haiu mit ne God haiu yaain te haiu mamriak menmen yaaim yapirwe mirak.

Ti atip mit miyapir him yaaim me God

4 ¹⁻² ^uHi hetput him manp, God Haai ketike Jisas Krais, hirakit tirawir teit ninaan mirakit. Hi hetput hentar Jisas Krais pike kaknen te maain hirak skelim mit nepu nantike mit kerek epei naa. Hi hetput te ti atip mit miyapir him me God, ti eteikin mit hir nises menmen enum, ti eneri, ekeykor han kir te hir enises menmen yaaim. Ti eteiknorem werék werék han enuk eriuweri au emit! ³ ^wTi eriak menmen im hentar maain mit miyapir hir naninapen nanimtau him yaaim me God au. Hir hanhan nanimtau him enum me memipin mamnip han kir yaaik. Te hir nanri mit yapirwe nanitorhi te hir nanitpor him, hir hanhan nanimtewem. ⁴ ^xHir nanweikin sip nanwet him yaaim em, hir nanises him weinim me mit. ⁵Hekrit hekrit te ti naanmamre hirekes, ehirp han tokik me menmen enum enum mamnen, ti atip mit him yaaim me Krais Jisas te hir nanimtewem. Ti eriakem iuwe, te ti ere mitik ke God yaaik.

Wok me Pol hiram menep epei au

⁶ ^yTi ehises menmen hi hetputem, te hi au. Wi epei mamnen te mit naniyep te hi hahi. ⁷ ^zHi epei hiriak menmen God nipaa kehimitena hi hiriakem. Hi hire mitik kesiuknen resis ken kipium mak. Menmen hi hiriakem hiram epei au. ⁸ ^aTe menmen yaaim me himin kai memeriyo miwaai meit wit ke God. Maain God hirak Mitik Iuwe Yaaik skelim mit, hirak kakwetewem. Te hi kiutipen au. Hirak kakwet mit han kerek nanmeriyiwék hir hanhan hirak kakwepyapir hirekes kakit ti ik, hir nantikewa haiu mamit menmen yaaim hirak kakwetaiyem.

Him meiyam kike

⁹ ^bTi ap era era ehit yayiwe au emit! Ti enen waswas hentar

¹⁰ ^cDimas epei kinaipisa ken wit Tesalonaika, hirak hanhan keriuwe menmen enum mit hanhan em. Kresens epei ken wit Galesia, Taitas ken wit Dalmesia. ¹¹ ^dLuk kiutipen kerekek kau ketikewa. Ti ehithis Jon Mak hirak kaktikewit yi einen in kakintar hirak yaaik kakikepa. ¹² ^eHi heriuwet Tikikas hirak epei ken wit Efesas. ¹³ ^fWi kerek ti enen, ti ehit

^t 3:17 2Ti 2:21 ^u 4:1 Ap 10:42; Ro 14:9-10 ^v 4:2 Ap 20:20, 31 ^w 4:3 1Ti 4:1; 2Ti 1:13
^x 4:4 1Ti 4:7 ^y 4:6 Fl 2:17 ^z 4:7 1Ti 6:12 ^a 4:8 1Ko 9:24-25; Rev 2:10 ^b 4:9 2Ti 1:4
^c 4:10 Kl 4:14; Ta 1:4 ^d 4:11 Kl 4:14; Ap 15:37-39 ^e 4:12 Ef 6:21-22 ^f 4:13 Ap 20:6

saket kai nokik kerek nipaa hi enemtin ewisim miwaai meit winak ke Kapas keit wit Troas. Te ti etiwem mamtike tiwei mei. Tiwei mit nipaa mit niriakem me miyak patin, ti etiwem eiyim enen hi hanhanem iuwe.

¹⁴ Aleksanda, mitik kime bras ain, hirak kerekyo menmen enum enum. Mitik Iuwe kakrekyiwek enum mamrer menmen me hirak epei kerekyewem. ¹⁵ Ti naanempre hirekes me hirak hentar hirak katip enum enum me him yaaim me Kraiss haiu matip mit em. ¹⁶ Wi hi hinin hen kot ke gavman hatip him naanempre hirekes, mit han nekepa au, hir ninaipisa. Hi hanhan Mitik Iuwe ap han kitet menmen im enum hir niriakem keremem. ¹⁷ Te Mitik Iuwe kekepa kerekyo hi han tokik hau. Mar im hi hatip mit him me God te mit yapirwe neit kot nemtewem. Te Mitik Iuwe kekepa, mit ap neiyep hi haa au. Hi hepu werek. ¹⁸ Maain Mitik Iuwe kakikepa me menmen enum enum kakiriya kakwisa hahit wit kirak naanmamprau. Haiu emwenipi niuk mirak hirak iuwe tipmain tipmain enum eik. Keremem.

¹⁹ Ti atip Prisila wetike Akwila hir netike mit miyapir nikerek ne mitik Onesiforas, ti etpor hir yaain. ²⁰ Irastas wen kepu wit Korin. Hi hinaipis Trofimas hirak kinap keit wit Mailitas. ²¹ Te ti enen wasenum. Maain hawi hitan nime yuwerep mamnen.

Yubyulas, Pyudens, Lainas tetike mite Klodia natip ti yaaik, hir netike nit yinan yapirwe in.

²² Hi hanhan Mitik Iuwe kaku kakikre han kit. Hi hanhan Mitik Iuwe han yaaik kirak kaku kaktikewi.

Mepir keremem

⁸ 4:14 1Ti 1:20; Sam 62:12; Pro 24:12; Ro 2:6 ^h 4:16 2Ti 1:15 ⁱ 4:17 Ap 23:11, 27:23; Dan 6:22 ^j 4:19 Ap 18:2; 2Ti 1:16-17 ^k 4:20 Ap 19:22, 20:4